

COVID-19: KKM masih mempunyai kelengkapan cukup di Sabah
Astro Awani
24 Oktober 2020
Fareez Azman

PUTRAJAYA: Kementerian Kesihatan Malaysia (KKM) masih mempunyai kelengkapan mencukupi bagi mendepani pandemik COVID-19 di Sabah.

Menurut Ketua Pengarahnya, Tan Sri Dr Noor Hisham Abdullah, sehingga kini sebanyak sembilan hospital telah dikenal pasti bagi merawat pesakit COVID-19.

"Setakat ini, kita menggunakan sembilan hospital yang telah dikenal pasti. Kita juga kenal pasti ruang-ruang untuk kita jadikan Unit Rawatan Rapi (ICU).

"Kita dapati ramai pesakit tahap empat yang memerlukan oksigen tetapi tidak memerlukan bantuan pernafasan. Pesakit tahap 3, 4, dan 5 kita tempatkan di hospital. Pesakit tahap 1 dan 2 kita tempatkan di pusat kuarantin dan berisiko rendah," katanya dalam sidang media pada Sabtu.

Jelasnya, sehingga kini sebanyak 31 pusat kuarantin dan risiko rendah telah dibuka bagi merawat pesakit COVID-19 pada tahap 1 dan 2.

Dalam pada itu, Hospital Media di Hospital Tawau turut dibina bagi meneruskan rawatan pesakit bukan COVID-19.

Menurut Dr Noor Hisham, KKM mempunyai 1,123 katil bagi pesakit COVID-19 di hospital. Manakala lebih 4,700 katil di pusat kuarantin dan berisiko rendah.

**© 2020 Astro Awani Network Sdn. Bhd.
(535275-D) All Rights Reserved.**

Source: <https://www.astroawani.com/berita-malaysia/covid19-kkm-masih-mempunyai-kelengkapan-cukup-di-sabah-265112>